

SPRM siasat semua kes termasuk cincin Rosmah - Abu Kassim
Astro Awani
April 15, 2015

KUALA LUMPUR: Suruhanjaya Pencegahan Rasuah Malaysia (SPRM) tidak mengamalkan pilih kasih di dalam siasatan dan tidak memberi pengecualian walaupun kes ia diklasifikasikan berprofil tinggi.

Ketua Pesuruhjaya SPRM Tan Sri Abu Kassim Mohamed berkata, ia termasuk melibatkan isteri Perdana Menteri, Datin Seri Rosmah Mansor dalam siasatan pembelian cincin yang hangat diperkatakan pada 2011.

"Kita siasat dakwaan pembelian cincin RM24.4 juta oleh Rosmah satu jam selepas laporan dibuat pada SPRM pada 2011.

"Dua jam kemudian, saya menghubungi Perdana Menteri Datuk Seri Najib Razak dan meminta isterinya membawa cincin yang diperkatakan itu," katanya ketika dipetik Sin Chew Daily.

Kata Abu Kassim, pegawainya juga menghubungi Jabatan Kastam pada hari berikutnya dan mendapat pengesahan bahawa cincin itu dihantar balik ke New York.

"Ini kali pertama kami dedahkan perkara ini.

"Saya hendak beritahu kamu, kalau kami siasat isteri perdana menteri, apakah lagi ada kes yang kami takut untuk disiasat?" katanya.

Copyright © Astro Awani Network Sdn. Bhd. 2015 (535275-D). All Rights Reserved.

Source: <http://www.astroawani.com/berita-malaysia/sprm-siasat-semua-kes-termasuk-cincin-rosmah-abu-kassim-57891>